



Шочмо эл, порылык да чын верч!

Б У Д Ъ Г О Т О В /

19-ше (3719) №,
2025 ий 16 май,
кугарня



0+

Ямде лий

1933 ий 1 февраль годсек лектеш.

18 май – Тоштерын
тўнямбал кечыже.



Уш-акылым пойдарыме вер

Кугезе коча-кована-влак кузе илен-ныт, нуно мом кочкыныт, могай сомылым ворандареныт, чийыме вургемышт могай лийын? Нине да моло йодыш-шамычым тоштерыште рашемдаш лиш. Теве Медведево район У Арбан школышто тунемше-влаклан торащкат кошташ ок кўл. Школ пеленак поян тоштерышт

уло. Тўналтышым 2005 ийыште Л.А.Беляева ден А.В.Смирнова пыштеныт. Нуно ял калык деч 300 наре арверым погеныт.

Кызыт Людмила Аркадьевна Яндыганован (пурла снимкыште) вуйлатымышлан кўра тоштер ушўлышым налын, шуко онгай экспонатлан пойдаралтын. Экскурсийым

библиотекарь Г.Ю.Соколова (снимкыште) але Л.А.Яндыганова эртарат. Тоштер кок пўлеман. Икымшыже мари́й калыкын историйже да тўвыраж дене кылдалтын, весыже школ историйлан пўлеклалтын.

Оля МАЙКОВА.

Катя СЕРГЕЕВАН фотожо-влак.

Умбакеже – 3-шо лаштыкыште.

подписке

Россий мучко 2025 ийын кокымшо пелийжылан газет ден журнал-влаклан подпискым ыштыме тургым эртаралтеш.

«Ямде лий» газетлан возалташ вашкыза. Ак – 501 тенгеат 42 ыр (Марий Элыште). Индекс – П4696.

Рекламс.

Медиакласс вуча!



Йошкар-Оласе Бауман лицей журналист лияш шонышо-шамычым 10-шо медиаклассыш тунемаш пураш ўжеш.

«Журналистика и медиа» на-правленийыш республикысе школлаште 9-ше классым «3»-ан отметке деч посна тунем пыта-рыше ўдыр-рвезе-влакым вучат. Тунемше-шамыч 21 июньышто

10 шагатлан руш йылме дене тес-тым возаш да портфолиом ара-лаш тўналыт. Тўрыс уверым QR-код дене але лицейын офици-ал сайтыштыже ончыза – my18.ru. Лекше йодышым директорын ту-немме да воспитаний паша шо-тышто алмаштышыже О.А.Гусева-лан 38-60-61 телефон номер дене йынгыртен рашемдаш лиеш.

Парад келшен

Сенгымаш кечылан пōлеклалтше парад тўрлō олаште эртаралтын. Йошкар-Олаштан лийын. Мый ту-дым шке шинчам дене ужынам. Тиде кугу пиал. Парад пеш кел-шен. Эн чотшо – танк. Кужу жап ты парадым шарнаш тўналам.

Александр ИВАНОВ.

Мый парадым телевизор дене онченам. Ешыште тыгай йўла шукертак уло. Мыланем ўдыр-влакын рын ошкылмышт келшен. Моткоч моторын койыт.

*Света СОКОЛОВА.
Морко, Коркатово.*

Чолга йолташна



Мемнан 5-ше «Б» классыште Павлик Марков тунемеш. Тудо мыйын поро йолташем. Мый ту-дын дене кугешнем. Сайын ту-немеш да тўрлō конкурсышто мастарлыкшым терга. Эре сеныше-влак радамыш лектеш. 26 апрельыште Йошкар-Олаш «Мыйын еш архивем» респу-бликысе конкурсыш еш дене (снимкыште) пырля миен. «Ешын Шарныктыш книгаже» номина-цийыште кумшо верыш лекты-ныт. Тиде мыланна куан. Павлик мемнам тиде книга дене палы-мым ыштен. Ме тудым куанен колыштынна. Умбажыжат тыгай чолга лияш тыланена.

*Миша СТЕПАНОВ.
Звенигово, Чакмарий.
Фотом еш архив гыч налме.*

Российысе увер

Кенеж канышым еш дене эртараш йōн уло. Июньышто «Смоленское поозерье» калыкле паркыште «Родные-любимые» еш слёт лиеш. Йодмашым 26 май марте колтыман. Кумданрак projects.pervue.ru сайтыште лудса.

12 ийым эртыше ўдыр-рвезе-влак, Кугу Ачамланде сар нерген палымыдам «Союзный диктант» тўнямбал акцийыште тергыза. Тидлан 31 май марте союзный-диктант.рф сайтыште тестым решатлыман.

«Нити культуры – 2025» усталык конкурс 31 май марте шуйна. Кугу Ачамланде сарыште Сенгымашлан пōлеклалтше эссе, медиа але сўрет проектым ямдылыман. Тичмаш уверым libfl.ru сайтыште ончыза.

Марий Элысе увер

5 июньышто Йошкар-Оласе тўвыра да каныме паркыште Йо-ча пеледыш пайрем эртаралтеш. Мероприятийыш кажне район гыч 15 сган делегацийым вучат. Йодмашым 23 май марте колтыман. Тўрыс увер – mari-centr.ru сайтыште.

«Храним огонь Победы» всероссийский акций кышкарыште Медведево ден Советский посёлкылаште Курымашлык тулым чўктеныт. Тулым Москосо Кремльысе «Палыдыме салтакын шўгарже» архитектур мемориал ансамбль гыч Россий Герой Дамир Шаймардановын аваже Ирина Викторовна конден.

Республикысе сўрет сымыктыш тоштерыште Андрей Эшпайын почмыжлан 100 ий теммылан пōлеклалтше ончерым келыштарыме. «Марий Эл Республикын самырык талантше-влак» XII конкурсын участникше-шамычын пашаштым 17 август марте ончаш лиеш.

Уш-акылым пойдарыме вер



Тўналтышыже – 1-ше лапшыкыште.

– Музейна пеш мотор. Ме класс дене тушко кошташ йӧратена. Мыланем сар жап дене кылдалтше пӧлка келша. Тушто тошто каске аралалтеш. Тудыжо кугу розжан, озаже сусырген, очыни, – ойла

4-ше «А» классыште тунемше Сергей Пятаев.

Тоштерыш пуремеке, шинчалан вигак марий вургеман курчак-влак, тўрлӧ солык, сӧрастарыш пернат. Тиде Л.А.Яндыганован «Иглоу рисуе красоту» ончерже.

– Тўрлаш йоча годсек йӧратем. Икана паша квалифи-

кацийым нӧлтымӧ курсышто кок тўрлӧ тунемме программыв темленят: компьютер дене пашам ышташ да марий тўрым келгынрак шымлаш. Мыланем кокымышжо утларак келшен. Тидын деч вара ты сомыллан кумыланьнам. Калык кидмастар Ираида Степанован книгаже пеш пайдале лийын. Тудым ончен, шукылан тунемынам. ИКН урокышто марий тўр дене йоча-влакым палдараш маньын, курчак-шамычым ямдыленам, – каласкала Людмила Аркадьевна.

Л.А.Яндыганова, пашаже-влакым иквереш чумырен, Йошкар-Оласе Калык арвер да сымыктыш тоштерыште лўмгечыже вашеш ончерым келыштарен. Мероприятий деч вара чыла экспонатым школ музейыш конден. Тыге школ тоштерлан эше ямлырак тўсым пуртен да пойдарен.

*Оля МАЙКОВА.
Катя СЕРГЕЕВАН фотожо.*

Тоштерыште йокрок огыл

Калыкын историйжым, тўвыражым аралыше тӧнежыш йоча-влак куанен коштыт.

Мария ГОРШКОВА,
(2-шо номеран Морко школ):
«Ме класс дене Морко посёлкысо М.Н.Янтемир



лўмеш тоштерыште эртаралтше мероприятийлаш эре ушнена, тушто экскурсий денат лиедена. Марий кундемын чапланыше просветительжын, краеведшын, этнографшын илыш корныж нерген колышташ келша».

Анна БЕРДИНСКАЯ (2-шо номеран Шернур школ):
«А.Конаков лўмеш Шернур тоштер да ончер комплексыште, школ пеленысе тоштерыште лийынам. «Гра-



ция» куштышо ансамбль дене Ставропольыш выступатлаш мийымына годым ты олан ик тоштерышкыже пуртеныт. Тушто кундемын историйже дене палдареныт. Сар жаплан пӧлклалтше экспонат-влак, мамонтын лужо, шергакан кўшамыч шарнымашеш кодыныт».

Ксения СТЕПАНОВА
(Советский, Топкайзнер):

«Шукерте огыл класс дене пырля Йошкар-Оласе Т.Евсеев лўмеш Калыкле тоштерыште лийынна. Кугу тӧнежын кажне пӧлкашкыже пуренна. Экскурсовод онгайын каласкален, ме тудым тўткын колыштынна. Мыланем пеш келшен. Умбажыжат тоштерыш кошташ кумыл лектын».



*Оля МОШКИНА ямдылен.
Авторын фотожо-влак.*



«Хранители истории» всероссийский проект, школышто тунемше да кугыен-влакым иктеш ушен, поро пашалан кумыланда. Шукерте огыл ме, 2-шо номеран Красногорский школы тунемшыже-шамыч, тўналтыш классыште туныктышо Нина Васильевна Игнатъева (снимкыште) да ача-ава-влак верысе мемориал комплексым шотыш конденна: шўкым коранденна, чиялтенна. Кодшо ийын, шыжым, пеледышым шынден коденна ыле, кызыт нуно моторын пеледыныт. Умбажыжымат ты верым эскераш да эрыкташ тўналына.

*Валерия ПАКАЛИНА.
Звенигово, Красногорский.
Фотом школ архив гыч налме.*



Марий шўлышым ялыште ара-лен кодаш куштыгырак. Но марий ешеш шочынат гын, олашке але ола воктек илаш куснет гынат, руш, татар але вес калык нигунам от лий. Курымешлан марий кодат. Ты шонымаш дене Медведево посёлкышто илыше Ятмановмыт еш (снимкыште) тўрысnek келша.

Екатерина Вячеславовна ден Евгений Иванович У Торъял район гыч улыт, ик ялеш шочын-кушкыныт, ик школышто тунемыныт. Ешым чумырымыштлан 13 ий лиеш. Суртоза Йошкар-Олаште Политехнический институтым тунем пытарен, озавате – Киров оласе медицине академийым. Евгений Иванович кызыт рўдоласе ик заводушто инженерлан пашам ышта. Екатерина Вячеславовна Республикысе наркологий диспансерыште ятыр ий тыршен. 2023 ий гыч – ФСИН-ын 12-шо медсанчастышыштыже кугурак психиатр-нарколог.

Ача-аван корныж дене

Пиалан, чолга ешыште кум икшыве кушкеш. Кугуракышт, Вика, 3-шо номеран Медведево школышко 4-ше классышке коштеш. Сайын тунемме деч посна усталык-лан ятыр жапым ойыра. Сўретла, меж гыч тўрлў арверым ышта, макраем пидеш. Тыгак англичан йылмым келгын тунемеш да бассейныште капкылжым шуара. Ончыкыжым аважын корныжым тошкаш шона – врач лийнеже.

Матвей икымше классыште тунемеш. Конструктор дене ятыр жап шинчылтеш, легом пога. Самбо, футбол дене кылым куча, бассейныш коштеш. Ачаж гай инженер лийнеже. Кочажын гармоньым шоктымыж почеш марла кушташ мастар.

Артём йочасадыш коштеш, школыш каяш ямдылалтеш. Изаж се-мынак самбо дене кылым куча.

15 май – Ешын
тўнямбал кечыже.



Ончыкыжым ветеринар лияш шона. Мўнгыштў Петушок колым куанен онча. Тыгак мўнгыштышт кутко ферме уло. Тудымат кумылан шымла. Икшыве-влак марий шўлышан кушкыт.

– Вика марла удан огыл кутыра. Тудо У Торъял районышто коча-коваж дене жапым эртараш йўрата. Марий йылме Викалан лишыл. Рушла гыч марлашке сайын кусара. Рвезе-влакат акашт деч вараш ынеш код, шымлат. Марла куштит, – ойла ава.

Мастарлыкым тергат

Ятмановмыт тўрлў конкурсышто мастарлыкштым тергаш йўратат. Ятыр фотопроектышке ушнен, сенгышыш лектыныт. Йочасадын темлымыж почеш «Ача-ава дене пырля» регион-влак кокласе конкурсышто эн уста еш семын палемдалтыныт. Кодшо ийын Матвей ден Артем йочасадыште эртаралтше «Национальный костюм народов Поволжья» смотр-конкурсышко ушненыт. Марий рэпер Шып Лийын образшым ончен, вургемым ямдыленыт, рэпым лудыныт да кокымшо лийыныт.

Яра жапыште

Ача-ава ялыште шочыныт, изинек мланде пашам ыштен кушкыныт. Садлан кум ий ончыч мландым налыныт. Кызыт тушто пўртым нўлтат, мончам чонынешт. Пакчасаскам, емыжым кушташ. Йоча-влакым изинек пашалан туныктат.

Каныш кечылаште пўртўс лонгашке лектын коштыт. Кенжежым ер воктене палатке дене верланаш йўратат. Телым «Корта» тунемме да тренировкым эртарыме бazyште ече дене мунчалтат.

Пошкудо регионлашке экскурсий дене коштыт. Моско, Владикавказ олалаште лийыныт. Тўрлў верым ужын, мўнгў у шонымаш, у шўлыш, у вий дене пўртылыт.

Йўла

Ятмановмытын йўлашт уло. Еш мероприятийлан тўрлў теме дене кылдалтше тортым ямдылат. «Курьмашлык полк», пушенгым шындыме акциялашке ушнат. У ий деч ончыч, еш альбомым пойдараш шонен, фотосессийыш коштыт.

Икте-васылан полишкалаш изинек туныктат. Тидлан ача-ава примерым ончыктат. Мутлан, ача ик икшывым кружокыш нангая гын, ава кочкаш шолта, йоча-влак-лан урокым ышташ полша. Да мўнгешла. Вика шольжо-влак-лан мўнгысў пашаштым умылта-ра, терга.

– Ме ўдыр-эргына-влакым чын верч шогаш туныктена. «Иктаж-мом йоньылыш ыштенда гын, ида шылте, вигак ойлы-за. Иктаж-мо деч лўдыда гын, польш кўлеш гын, мемнан деч йодса. Эре полшена» манын умылтарена. Йоча – ылышын пеледышыже. Нуно пеленна улыт – ме эн пиалан да поян улына, – ойлат ача-ава.

Христина АЛЕКСАНДРОВА.
Фотом еш архив гыч налме.

Шочмо кундемым шымлат



шöрым шымлаш, йоча-влакым шымлыме пашалан кумыландаш. Кружокым ике вуйлатыме классем дене эртарем. Вес класс гычат ушнаш кумылан-шамыч улыт. Занятийште книга, газет, энциклопедий-влакым шергалына. Оңай ең дене вашлиймашым, краеведений дене кылдалтише мероприятийым эртарена. Проектым, шымлыме пашам возена, – ойла Надежда Михайловна.

Тылеч посна Хлебниково села мучко экскурсий дене коштыт. Пүртүсын моторлыкшым ончен, вершöрым шымлат (снимкыште), калык дене вашлийыт. Яндар южышто икте-весе дене кутырен, у шонымаш шочеш. Тыге шымлыме паша-влак возалтыт. Мутлан, Вера Волкова «Библиотекарь – её призвание» пашам серен. Тушто Ираида Михайловна Крестьянинова нерген ойлашеш: «Марий АССР-ысе тўвыран сулло пашаеңже И.М.Крестьянинова Хлебниково селасе книгагудым 1956 ийыште вуйлаташ тўнгалын. Икмыняр тўжзем книган озаже лиймеке, тўшка мероприятийым чўчкыдын эртарен. Селаште илы-



ше кажне ең чолга лудшо лийже манын, чот тыршен. Школышто тунемше, самырык-шамычым тематике каслаш, уш-акыл модылаш чумырен. Ираида Михайловна дек книгагудыш изижат-кугужат полшышым йодын миенит. Ираида Крестьянинован пашам ыштыме жапыште библиотекем ятыр диплом, чап кагаз дене палемдыме. Нунын нерген районысо газетыштат чўчкыдын серенит.

А Екатерина Иванова коважын, Антонида Михайловнан, илыш корныжым радамлен, кугешнен возен. Тыгак туныктышо, поэт, писатель-шамыч нерген шымлыме пашам серенит.

– Хлебниково села сылне верланат, уста еңланат поян. Шымле да шымле! – ойла Надежда Багаева.

Христина ТОКПУЛАТОВА.
Фотом школ архив гыч налме.

• Филворд •

Марий Элын 14 районжым кычалын муза.

М	Е	Д	В	Е	Д	Е	В	О	И	В	О	Л	К
О	Е	К	У	Ж	Е	Н	Е	Р	Г	А	П	В	У
Р	Ш	О	А	К	М	П	Ю	К	Е	М	Н	О	Р
К	И	Л	Е	М	А	Р	Р	Й	М	Н	Р	А	Ы
О	Л	Ш	К	Й	Р	О	В	Б	Н	Р	Ы	С	К
К	Ч	Л	О	М	О	В	А	Ю	Р	И	Н	О	М
Р	У	Ч	Р	Й	Л	О	Ш	Л	М	Н	У	В	А
Г	Б	А	Ш	О	Ы	Й	В	С	Н	Ч	Ж	Е	Р
Д	А	Р	А	Н	Ч	В	Б	Е	Р	С	Т	Т	И
Ш	Е	Р	Н	У	Р	С	Ы	Р	С	К	И	С	Й
М	Ч	Н	К	Д	Р	Б	Г	У	Р	М	И	К	Ш
К	У	П	А	Р	А	Н	Б	Г	А	Ы	Р	И	А
С	П	О	Т	Т	О	Р	Б	Я	Л	С	Т	Й	Л
М	А	Р	И	Й	–	Т	У	Р	Е	К	Р	В	О

Яна ЭБРАЕВА.
Волжский, Сотнур.

Кум уреман Семисола

Кажне кенжежым кочам деке унала Морко район Семисолаш кудалам. Кум уреман ял мыланем моткоч келша. Тушто шуко ўдыр-рвезе дене палыме лийынам, нунын дене ынде сай йолташ улына. Пырля модына, Ировка энгерыш йўштылаш коштына, верысе книгагудышто жаппам эртарена. Пошкудо Нурўмбал ялыш икмыняр гана миенам. Тушто йоча-влак мыланем школым ончыктенит.

Семисола деч тораште огыл – Чўкшö курык. Тушко Олег кочам чўчкыдын нангая. Карьер кугу, öрыктарыше. Верысе чодырат сылне. Тудыжым кочам «Шке вич парням гай палем» манеш.

Екатерина МАКАРОВА.
Йошкар-Ола, 2-шо номеран школ.

• Ушан ой •

Уло мландымбалне
Муро – шочмо ял.

Зоя ДУДИНА.



Марий йылмына моткоч поян. Тўрлө кундемыште тўрлө се-мын кутырена, ик значениян шомакым тўрлө семен ойлена. Диалект ден наречий-влак улыт. Нунын кокла гыч шагал кучыл-талтшылан кас-йүдвел наречий шотлалтеш. Тудо Виче, Угарман кундемлаште, Килемар, Медведево районлаште палдырна. Курык-марий наречийым ушештара да эркын-эркын йомын толеш. Туге гынат шочмо йылме верч тур-гыжланыше-влак улыт. Теве Виче кундем Кикнур районысо Шапта селаште тўвыра пörтым вуйлаты-ше М.Н.Белова (**снимкыште пок-шелне**), кызытсе технологийым кучылтын, шочмо йылмыжлан у шўлышым пуа.

– Районыштына марий-влак шукын илат, но кызит йоча-ша-мыч огыт кутыро веле огыл, эсогыл огыт умыло. Мемнан



наречийна ойыртемалтше, ике семенже мотор, муро семен йонга. Садлан тыгай поянлыкым арален кодаш манын, «ВКон-такте» соңкылыште тўвыра пörтын тўшкаштыже «Мар-ла ойлаш тунемына» проектым тўнгалынна. Мый шомак-влакым рушла да марла ойлем, а кур-чак-влак почешем раш каласат. Тидым видеош войзена. Тачысе кечын латкумыт уло, – ойла Милитина Николаевна.

Видеошто маскам, мераным, жирафым, куголям ужащ лиеш. Нуным ансамбльлашке коштшо артист-влак йўкандат, тарва-тылыт. Курчак-шамычым М.Бе-лова художественный вуйлатыше Н.В.Осокина дене пырля ике ур-

геныт. Янлык-влакым йоча-ша-мыч дене тўрлө постановкым шындыме годымат ужащ лиеш.

– Тўшкаштына тыгай видео-влакым шукын ончат. «Кел-ша», «репост» манмат шуко, шонымашыштымат возат. Иктаж-могай шомакын кузе йонгымыжым огыт пале гын, йодын серат. Тиде йодыш-лан урокыштына ваетиштен. Шукыж годым проект кугурак ийготан-шамычлан оңай, но самырык тукумат жапын-жа-пын эскера. Тугеже йылмына илаш тўнгалеш, – ойла Милитина Николаевна.

Христина АЛЕКСАНДРОВА.
Фотом тўвыра пörтын архивше гыч налме.

Йоча республикыште келшен илат

Одо кундем Ныргындыш тўвы-ра пörт пелен тўрлө ийготан йо-ча-шамычлан келыштарыме «Ўдыр ден рвезе-влакын республикышт» ушем пашам ышта. Тушко 15 ма-рий йоча коштеш.

– Ты ушемыште кажныже ика-лан келыше сомылым муын кер-теи. Уста шўлышанлан ме сўрет-лаш, мураш, кушташ, пластилин але шун гыч ненчаш, театр сту-дийыште мастарлыкым вияндаш йöным ыштен. Спорт дене кылым кучышо-шамыч тўшка модмашыш, таңасымашыш ку-мылын ушнат. Проектым возат. Тыгак тунемше-влак тўрлө ме-роприятийыште волонтер семен пашам ыштат. Изирак ийготан икшывылан, коча-ковалан кер-тмыш семен полишат, – ойла «Ўдыр ден рвезе-влакын респу-бликышт» ушем вуйлатыше Анге-



лина Алексеевна Тимофеева. Тудо Ныргындыш тўвыра пörтыштö йоча да самырык-шамыч дене пашам ышта, икмыняр кружокым вўда.

– Икыме классыште тунем-мем годымак ушемыш ушненам. Ончыч куштымаште мастарлы-кым поганам, кызит актёр семен

виянам. Сценыште выступат-лаш, тўрлө рольым модаш йöра-тем. Ушемыште мыланна тўрлө квестым, мастер-классым, кон-курс, вашлиймашым чўкыдын эртат. Ты ушемыш еңже улмем дене кугешнем. Ме ик кугу еш се-мын ваш эңертен, полишен, келшен илена, – палдара ушемыш еңже Полина Култашева. Ўдыр Ныр-гындыш кыдалаш школышто 9-ше классыште шинчымашым пога.

«Ўдыр ден рвезе-влакын рес-публикышт» ушемлан умбакыжат виянгаш, марий йылмым, тўвы-рам жаппен илаш тыланена. Тек ушемыштышт йоча-шамыч еша-ралтыт да усталык лектышышт дене куандарат.

Оля МАЙКОВА.
Снимкыште: А.А.Тимофеева
ден П.Култашева.
Фотом ушемыш архивше гыч налме.

Йочасадыште – Сенгымаш парад



Йошкар-Оласе 61-ше номеран «Теремок» йочасадыште Кугу Ачамланде сарыште Сенгымашлан 80 ий теммылан пӧлеклалтше Сенгымаш парад эртаралтын. Самырык тукум деке унала СВО-што лийше салтак, военнослужащий да силовой структурлаште пашам ыштыше-влак толыныт.

Парадым школыш каяш ямдылалтше йоча-шамыч строй дене ошкылын да речӧвкым ойлен

почыныт. Моло ўдыр-рвезе-шамычат рын ошкыл моштымыштым ончыктеныт. Мероприятий «Курымашлык полк» акций дене мучашлалтын (снимкыште). Кугырак-влакым пагалаш да шарнаш, шочмо кундемым да тудын эртыме корныжым шымлаш туныктен, ме ўшанле у тукумым ончен куштена.

Татьяна КУТЮКОВА.
Фотом йочасадын архивше
гыч налме.

Тул модыш огыл



Российыште Пожар охранны кечыжым 30 апрельыште палемденыт. Тиде пайрем вашеш «Шонанпыл» йочасадыште комплексный мероприятий эртаралтын

(снимкыште). Йоча-шамыч пожар годым шкем чын кучымо правил нерген шинчымашыштым пенгыдемденыт, тыгак пожарный профессий дене палыме лийыныт. Туныктышо-влак тул лўдыкшыдымылык нерген каласкаленыт, пожарым йӧртымӧ ўзгарла дене палдареныт. Тыгай мероприятий йоча-шамычым тул дене тўткӧ лияш да тўн правил-влакым шарнаш туныкта. «Тул модыш огыл» ойлончым чын умылаш полша.

Ирина СЕМЕНОВА.
Медведево, Новый посёлок.
Авторын фотожо.

Мо тыгай пагалымаш?

Мыйын шонымаште, Вончўмбал ялыште илыше Руслан Леонидович Васильев – моткоч пагалыме айдеме. Тудо мыйын ачам. Руслан Леонидович пошкудо-шамычлан полшаш эре ямде. Кеч-могай йодыш дене толыт гынат, ой-кагашым пуэн мошта. Садланак ял калык тудым пагала, уда шوماкым нигӧ ок ойло. Ен-влакын пагалымашыштым сулаш подвигым ыштыман огыл, а чын да мутым кучышо айдеме лийман. Ачам пилорамыштат тыршен пашам ыштен, лесник улмыж годымат вуйшиймаш лийын огыл. Кызыт ачам сурт сомылкам ышта. Ушкалым онча. Шӧр-торыкым родо-тукумлан, пошкудо-влаклан пуэда. «Кеч изи польшышым ыштем гынат, чонем куана», – ойла ачам.

Мария ВАСИЛЬЕВА.
Морко район.

Уман ой

Айдеме шкенжым кузе куча, кузе мутлана, тугак тудым аклат.

Юрий АРТАМОНОВ.

М.ШКЕТАН ЛЎМЕШ МАРИЙ
КУГҮЖАНЫШ ДРАМЕ ТЕАТР

23 18:00
МАЙ

МАРИНА ВОРОНЦОВАН ЛЎМГЕЧЕ КОНЦЕРТШЕ
ШОЧЫНАМ ЧЕВЕР ТЎНЯШ
ЧОН ЙЎКЕМ ДЕНЕ МУРАШ

Родилась душою петь!

6+ РАСКЛАМ

78-13-78



0+

Марий Эл
Республикысе
«Марий Эл»
увер агентстве» КАУ.
Директор –
Е.И.КУЗНЕЦОВ.
Тўн редактор –
А.Н.ГРИГОРЬЕВА.

Индекс П4696.
Тираж 1550 экз.
Заказ
Формат – А-4-8.

Учредитель-влак:
Марий Эл Республикысе Тўвыра,
печать да калык-влакын пашашт
шотышто министерстве,
Марий Эл Республикысе
«Марий Эл» увер агентстве» КАУ.

Редакций да издатель: Марий Эл
Республикысе «Марий Эл»
увер агентстве» КАУ,
424006, Йошкар-Ола,
СССР Вооружённый Вийын 70-ше
идалькыс урем, 20-шо порт.
Тел. 8(8362) 45-22-82.

Газетым редакцийыште
погымо да верстатлыме,
«Марий Эл Республикысе
Правительствын
типографийже» ООО-што
ямде оригинал-макет гыч
савыктыме.
Типографийын адресше:
424000, Йошкар-Ола,
Комсомольский урем, 112.

Печатьыш пуйымо жап –
14-00, фактически – 13-00.

Авторын да редакцийын
шонымашышт тўрлӧ лийын кертят.
Серыш-влак мӧнгеш огыт колталт.
Ак – кутырен келшыме почеш.

https://vk.com/yamde_lii
<https://t.me/yamdelii>
yamde_lii@mail.ru
yamdelii@mediamari.ru
Сайтын адресше: ямделий.рф

Газетым Кыл, информационный
технологий да массовый
коммуникаций сферым
эскерыме шотышто
федеральный службын Юл кун-
дем федеральный округысо
управленийыштыже
регистраватыме.
Номер – ПИ № ТУ52-01404,
2023 ий 22 сентябрьыште пуйымо.

У конкурс



Владислав Викторов – родо-тукымжо дене пырля.
Марий Турек, Кугу Нольо.

Йоча-шамлыкын
умылштым муза.

Филворд



Пакчасаскам да емыжым палемдыза.
Кодшо буква-влак гыч муткылдышым шопыза.

К	О	В	Ы	Ш	М	П	О	К
У	Ш	Й	Р	Т	Д	И	М	И
М	М	Е	Н	А	О	Р	И	Я
Ө	Р	А	Ш	О	Г	А	Н	Р
Ч	Е	С	Н	П	А	Р	Е	Й
У	П	Ы	О	У	Е	Г	Н	П
Р	С	А	К	К	Ж	Ы	Ч	Ө
К	А	Б	А	Р	О	П	П	У
Е	К	О	Ч	Л	Э	Н	Ы	Р
К	А	В	У	Н	Ж	Ы	С	О
Р	Е	Д	И	С	М	А	М	Л

Костя АЛЕКСАНДРОВ.
Волжский, Сотнур.

Пеледыш-влакым
келшыме ужаш
дене ушыза.Йоча-шамлыклан могай
упш келша? Кычалза.

Сүретым келшыме тӱс дене чиялытыз.

Маскалан кочкыш марте
миен шуаш полимиз.